

摘藻堂四庫全書薈要

集部

欽定四庫全書薈要

集部
文安集卷二

臣董誥詳校

詳校官助教臣謝登鵠



欽定四庫全書薈要

文安集

提要



臣等謹案文安集十四卷元揭傒斯撰傒斯字曼碩龍興富川人延祐初以薦授國史院編修官應奉翰林文字遷國子助教南歸復召還天歷初開奎章閣首擢為授經郎與修經世大典累官翰林侍講學士總修遼金宋

三史卒官追封豫章郡公謚文安事蹟具元

史本傳僊斯與虞集范梈楊載齊名其文章
叙事嚴整語簡而當凡朝廷大典冊及碑版
之文多出其手一時推為鉅製獨於詩則清
麗婉轉別饒風韻故虞集有美女簪花之目
然神骨秀削寄托自深要非嫣紅姹紫徒矜
姿媚者所可比也僊斯所著尚有秋宜集世
已無傳焦竑國史經籍志載僊斯集僅一卷

則明人因其遺集罕覩又從元文類諸書中
採掇別編漏畧殊甚是本凡詩四卷又續集
一卷制表書序記碑誌雜文九卷乃其門人
所編蓋猶元時舊本雖未足盡其著作之大
全然生平佳構亦畧具於是矣乾隆四十二
年三月恭校上

總纂官

臣

紀昀

臣

陸錫熊

臣

孫士毅

校

總

校

官

臣

陸

費

墀

欽定四庫全書蒼要卷一萬六千三百九十二

集部

文安集卷一

元 揭傒斯 撰

詩

臨川女

我本朱氏女住在臨川城家世事趙氏業惟食農耕五歲
父乃死天復令我盲莫知朝與昏所依母與兄母兄日困
窮何以資我身一朝聞密言與盲出東門阿母送我出阿

兄抱我行不見所向途但聞風雨聲行行五里餘忽有呼
兄名兄乃棄我走客前撫我言我與趙世親復與汝居鄰
聞汝即赴死扶服到河濱我身盡沾濡不復知我身汝但
與我歸養汝不記年涔涔遵旋路咽咽還入城城中盡驚
問戚促不能言望門喚易衣恐我身致患再呼我母來汝
勿憂饑寒汝但與盲居保汝母女全我母為之泣我鄰為
之歎喜我生來歸疑我能再明兄得與母居不異我父存
我今已十三溫飽兩無營我母幸康強不知兄何行我

母本慈愛我兄亦艱勤所驅病與貧遂使移中情當日
不知死今日豈料生我死何足憾我生何足榮所恨天
地生不如主翁仁誰能為此德婁公名起莘

夏五月武昌舟中觸目

兩髯背立鳴雙橈短簑開合滄江雨青山如龍入雲去
白髮何人並沙語船頭放歌船尾和蓬上雨鳴蓬下坐
推蓬不省是何鄉但見雙雙白鷗過

張君壽先生鵠山隱居

當日自期顏杲卿莫年羞見魯諸生膝兼多病終難屈
身為長愁視轉輕日晏典衣留客醉雨餘闌戶看兒耕
淮雲楚樹晴如掃臥送年年江水聲

送趙履道虞叔常還江右

趙子我同里虞郎我同年手折武昌柳送上西江船買
魚沽酒燒荻鞭夜下西塞寒山前西塞山碧如苔君今
去幾時來東風花開春水漲待君黃鶴磯頭望君庾公
樓上

寄題九江義門陳氏壽安堂

匡廬之陰彭蠡涯七百餘載真良家

宋御書表其門曰真良家

冲和

鬱勃吹不散飛落南山萱草花往時冠蓋如流水撞鐘
鼎食三萬指詔書十度復租庸每歲朝廷仍貸米父慈
子孝則四方紀淨網明照閭里蓬萊水淺昆明空天開
地闢元氣通張公百忍澤未竭王母千年桃始紅南山
築堂三百步翠竹屯雲森玉樹忠厚必有神明扶淳樸
自是期頤具方瞳綠鬢紅氍毹春酒搖蕩香扶疎公侯

子孫始必復日為太夫人起居

正月十二日尋盧學士船至漢口留詩為別

晴江澹微瀾洩雲在層巘參差連舫出散漫羣鷗遠始
知遵漢廣遙睇高旆卷懷賢每忘賤臨流亦忘蹇蒼茫
景將入窈渺春猶淺新知遽相違餘悰何由展

黃尊師高軒觀鵞因留宿

開軒南嶽下世事未曾聞落葉常疑雨方池半是雲偶
尋騎鶴侶來此看鵞羣一夜潺湲裏秋光得細分

衡山縣曉渡

古縣依江次輕輿落岸隈
鳥衝行客過山向野船開
近嶽皆雲氣中流忽雨來
何時還到此明月照沿洄

題王山仲所藏瀟湘八景圖卷走筆作

瀟湘夜雨

淅淅暗江樹荒荒楚天路
穩繫渡頭船莫放流下去

遠浦帆歸

冥冥何處來小樓江上開
長恨風帆色日日誤郎回

金
夕
日
人
之
行
卷一
煙寺晚鐘

朝送山僧去莫喚山僧歸
相喚復相送山露濕人衣

洞庭秋月

顥氣自澄穆碧波還蕩漾
應有凌風人吹笛君山上

平沙落鴈

天寒關塞遠水落洲渚闊
已逐夕陽低還向黃蘆沒

漁村晚照

定從海底出且向平沙照
漁網未全收漁舟還下釣

山市晴嵐

近樹參差出行人取次多板橋雙路口此世幾迴過

江天暮雪

孤舟三日住不見有人家昏昏竹籬處却恐是梅華

以事暫如武昌發臨川

江轉欲無路山迴忽似圍客程秋共遠物色晚多疑稍
稍沙鷗集怱怱野樹稀武昌今夜夢定有故人知

女兒浦歌

女兒浦前湖水流
女兒浦前過湖舟
湖中日日多風浪
湖邊人人還白頭

大孤山前女兒灣
大孤山下浪如山
山前日日風如雨
山下舟船自往還

送尹十六善叟謁告歸茶陵會葬賢兄處士十韻
八歲賴賢兄未埋
猶望生旋聞日下葬
敢戀世間榮得
告如無及嚴期
況有程意長看路
短義重覺身輕
鄉樹迎船出江雲
入暮橫望山占驛
堠聽鴈作城更
但使能

臨穴猶堪略慰情死生今古異去住別離并尚足
疇知已非貪美俗評忽忽不可盡迴首各沾纓

送黃五舅得武陵校官還辰州寓居省侍

寧上山頭種禾黍莫向他鄉作羈旅山田得雨尚有年
他鄉憔悴何人憐一身千里家何在全家更在沅湘外
獨樹鷄鳴楓葉飛荒村鴈沒蘆花碎親在窮邊望子還
子在長途衣復單居無寸田出無僕明年作音佐官當食
祿

貧交行

驅車涉廣川揚帆陟崇丘結交四海內中道多愆尤朔
風厲苦節獨鶴橫九州朝拂三島樹夕過五城樓兩翅
偶寒影曠然何所求登高臨大江日莫萬里流時哉疏
鑿人八年忘外留出必益稷俱歸與夔龍儔進退兩不
疑功成垂千秋萬事日相攸恩情若雲浮吾心苟不渝
反覆安足仇自非天地外何能獨忘憂

曉坐張先生朝陽軒

朝日照高樹幽人方啓關蕭寥塵外事風葉滿窓間

別武昌

欲歸常恨遲將行反愁遽殘年念骨肉久客多親故佇
立望江波江波正東注

南康夜泊聞廬阜鐘聲

廬山三百寺何處扣曾雲宿鳥月中起歸人湖上聞入
空應更迥近瀑正難分遙想諸僧定香爐上夕熏

春日雜言七首

日月朝朝新何物能獨久常恐天與地變化曾已朽東
風闖然來茫茫浩無首起視桃李樹睽豔一非舊如何
揚子雲泯默空自守

朝出城西門孤墳何穹窿雄狐竄其西脩蛇出其東云
昔有狂士七尺才且雄平生無所賴屠狗涉春冬一朝
際風雲身貴位益崇死生好惡間咄嗟生秋風氣驕日
憑陵家國兩蒿蓬子孫分散盡空有牛羊蹤

羃歷楊柳枝蒙茸春草齊天天誰家婦采桑臨路歧零

露沾其裳蛛絲卷其衣樹高身苦弱蚕饑行復遲辛苦
事姑嫜宿昔減容輝見者皆歎息此心知獨誰良人日
暮至醉問爾何為

啁啁田間雀啄啄常不給春水日已深網羅復相及既
無養生具日夕湯火急多謝雲間禽無為自羈繫

祝融九千丈瀟湘地底流洶湧洞庭野崩騰江漢秋上
有飛仙人身披紫雲裘昔者嘗相遇縹若乘丹丘同歌
黃鶴渚共醉岳陽樓思之忽不見獨立悵悠悠

我有琅玕草欲贈江東客出門道路長卷袂空歎息靈
苗世所尚良士余所惜神仙無千年耿耿誰復識

五歲能讀書十歲能賦詩十五事遠遊三十無所為既
乖俯仰責復為鄰里欺生計日已疎世態多瑕疵煌煌
金張門徒隸皆光輝日宴賓客集軒車如風馳一笑擲
千金片言委黃泥齊生獨抱琴來往何逶迤

夢兩雛

阿英十二能辟纁阿牛五歲貪讀書辟纁成縷無人織

讀書有志令人惜汝父飄零汝母休吾親雖健俱白頭
雨聲斷道風驚屋阿婆獨抱諸孫哭

夢武昌

黃鶴樓前鸚鵡洲夢中渾似昔時遊蒼山斜入三湘路
落日平鋪七澤流鼓角沉雄遙動地帆檣高下亂維舟
故人雖在多分散獨向南池看白鷗

遊麻姑山五首

并序

湖北憲使程公閒居盱上二年矣五月二十日詔拜翰

林學士又十日公與使者及諸客同遊麻姑山輒以覽
歷所止賦詩五首

雲關

君子荷初服恩至若無榮穆穆芳雨散悠悠蒼山行危
關擁霧黑飛術緣雲青苔蘚滑如積杉松窅冥冥時逢
負苓翁忽聞流水聲舉足向益高矯然欲遐征徒隸各
忘倦矧彼高人情

飛練亭

神工擲天紳挂之兩崖間萬古輸不盡誰能測其端勢
割山石愁氣挾草木寒安得天風吹繫彼日月還麻姑
綠雲髮黝黝長不殘

湧雪亭

泉源出地底仰向雲中行擘崖瀉千丈亂石皆騰擢風
霆日夜急雨雪虛空明不有神物扶茲山應久傾噴薄
側飛鳥磳鉤愁百靈仙家信為好喧聒何由平

三峽橋

兩山束飛橋下壑不測淵誰開萬尋鐵逗此無窮泉淙淙輒空曲沟沟投奔川陽光下照之忽作龍騰天常恐桑田變中有瞿唐船

麻姑壇

嵯峨仙都觀遙望丹霞天後有千歲松前有百頃田風日夏颯颯烟雲晝蔥芊羣彥一時集安知非列仙持觴起相醕罷琴抗高言天道信悠邈人情何拘攣靈君不可致落景詎少延仰雖慙冥冥俯實憂元元主人顧坐

客此中可忘年

盧學士奉旨南祀海嶽繇鍾陵相別聞尚宿留會
稽有懷奉寄

鍾陵一分手幾日過錢唐五日山陰路千峰海上涼烟
霞含景氣草木識天香夙昔經行處風深轉不忘

病夜

素壁深窓獨客身桃枝薑肱只為鄰極慙供給煩賢友
尚恐傳聞及老親蜚響戒寒相應起燭花連夜為誰新

多情造物真豪縱盡力相驅病與貧

得程翰林揚州消息

皇明屬休期側席佇貞良游麟既集數鳴鳳亦在岡君
子乘時興出餞何輝光車馬塞江介笳鼓凝羽觴時秋
風雨交四顧野茫茫晨鉦激中流飛旆忽異方蓄思導
旋軌浮雲紛北翔道路間邦畿草木隕寒霜晷景倏易
流悲來但徊徨君懷經綸憂我負灾疾妨騫沉固異趣
情誼結中腸居下衆所夷在賤誰不忘宛緬廣陵翰胡

獨置我傍鬱悒增愁思投穴睇莽蒼自顧匪茅茹委跡
任空墻淵淵賢達心恨恨情內傷

歸故園新居落成後作

親老身仍苦家貧歲更凶掄材斤斧後發地草萊中面
勢看前跡歡呼集衆功聊存今日意敢望昔時同

漂轉何多歲艱難且定居隣人供菜菓穉子進詩書稍
覺牛羊遠兼知蔓草除此園三百載亦復返吾初

山行

稍出羣山復涉溪溪光山色冷相輝青裙獨踞溪邊石
不顧行人自濯衣

寄題馮稼東臯園亭

時雨散繁綠緒風滿平原興言慕君子退食在丘園出
應當世務入詠幽人言池流澹無聲畦蔬蔚蔥芊高林
麗陽景羣山若浮烟好鳥應候鳴新聲和且閒時與文
士俱逍遙農圃春理達自知簡清忘可避喧庶云保貞
和歲暮委周旋

宿梁安峽夢故室有感時還盱江

梁安峽裏杜鵑啼絕壁蒼蒼北斗低雲氣倒連山影合
石稜斜鬬浪聲齊南風盡日迎歸客落月空江夢故妻
一室十人分數郡百年幾處候晨鷄

送趙仲遠赴甌寧

仍為令尹去如送武夷仙舊政閩人說新詩海客傳度
關風撤暑下瀨月依船不奪循良意因知幕府賢

山莊晚立有懷舍姪沆督獲臨川

款款黃桑葉蒼蒼白竹峰居人爭野碓歸客背村鐘
路暗緣溪濕山寒着霧濃阿咸收稻未辛苦闕相從

哭王十良作

深谷可為陵大海可為田唯有死者窮無由覩青天千
古黃壤間萬古黃泉下精神與時息形質隨日化日落
朝復生月缺望已盈不知死者別何時見形聲悲哉復
悲哉已矣復已矣我友初五人今焉忽成四死者不復
見生者長別離人生如春花美好知幾何欲為生者歡

須念死者苦死生日相尋歡樂如糞土

雨述三篇

江南臘月天未雪居者單衣行苦熱連山郡邑瘴盡行
豈獨嶺南與閩越逋民穰穰度閩山十人不見一人還
明知地惡去未已可憐生死相追攀

近聞閩中瘴大作不間村原與城郭全家十口一朝空
忍饑種稻無人穫共言海上列城好地冷風清若蓬島
不見前年東海頭一夜潮來跡如埽

冬來一晴四十日三日南風當有雪不知閩嶺今何如
念我故人書斷絕劍南判官心所親甌寧大夫政有神
腐儒多事浪憂喜安得貽書兩故人

春莫閒居寄城西程漢翁十五韻

迢迢曾城阿峨峨鳳凰山下有隱淪士能為淮漢言兩
日一寓音五日一承顏每談經濟事恒及離亂間言辭
多忼愾文字少凋殘不歎東逝川但憶南山田寧與無
心遊不受衆目憐褰衣必峻嶂散步亦名園舒卷信在

襟蕭寂固所安經春僂疾痠撫時增懦孱羣書亂藥裏
高臥掩荆關寒余屬久要朝詣常暮還醜劣愧高情焉
知君所觀日出衆鳥語蒼岑滿樓端申章寫深誼譎薄
何由宣

長風沙夜泊

長風沙風沙不斷行人嗟行人嗟奈君何南風正高北
風起大船初灣小船喜移船更近大船頭不獨風沙夜
可憂但祝行人好心事長江何處是安流茅屋參差數

株柳時平尚置官軍守青裙老嫗詫鮮魚白髮殘兵賣
私酒魚賤可買酒可沽他人心事知何如

何郎失鏡詞

團團如月不曾虧家人親置枕中時朝朝將正頭上幘
時時攜鑷鬢邊絲古文宛轉何人造失來始覺今難討
街頭不值半緡錢古銅終較今銅好向人不敢再三尋
客裏空疑同舍心萬里相隨一朝別夜夜還瞻天上月
贈青城侯尊師次人韻

聞說名山采藥蹤多從雲去少人逢蜀江春老歸難定
燕谷寒來望轉濃案上僊經新長蠹匣中雄劍舊降龍
不知少日尋真處還在青城第幾峰

贈友

天道有恒運君子蹈其常時物自熙洽庶心亦惟康鄙
人寬慮思殊氣冒陰陽霜霰中夏零焉得不摧傷先聖
有遺訓血氣戒方剛懿彼老氏言舌齒分存亡反躬實
明哲觀色屢迴翔正德詎云害率欲乃非祥勿謂壘空

明不足輸景光勿謂徑寸莖不足載春芳推餘暨昏朝
懷哉安能忘

曉出順承門有懷太虛

步出城南門張望江南路前日風雪中故人從此去

京城閒居雜言八首

都城列萬雉樓觀並飛霞太液深蕩瀾廣寒高嵯峨重
譯踰萬國流聲竟四遐既寵瑰異才復保勛舊家忠厚
跂行葦明照徹義娥永惟皇上德世世襲亨嘉

冀北多良馬漁陽多壯士馬休伏槽櫪壯士習農器桑
棗竟中州朝貢四方至外無烽燧警內有耳目寄逍遙
放良時歡樂永不替

濟濟從臣內赫赫公與侯伊昔從我皇守邊瀚海頭荷
戈十餘載力戰如已憂寸策無遺用長智少淹留勞多
必重賞功大靡輕酬意氣相傾動恩深身若浮天子乘
六龍垂衣臨九州茅土亘河山甲第隘莊廡四海仰光
耀出入擁華駟富貴欲如此寵祿信難侔從軍亦云苦

眷言享斯丘

朝從獵城南暮從獵城北白馬喻飛翰輕裘如膏澤塵
起如獸駭風高如鳥疾隻箭落雙鷺千金出俄刻歸來
拜恩寵樂飲過一石僮奴增意氣賓客改顏色常恐文
達士輕薄多瑕擿高門臨廣衢秋風上荊棘

朔土高且厚民生勁而彊榆柳雖弱質生植益繁昌桃
李大於拳棗栗充餽糧誰謂苦寒地百物莫得傷青青
雲夢竹宿昔傲雪霜移植於此庭不如芥與楊竹性豈

有改由來非本鄉

眇眇寒門士客途困臺城上無公卿故下無舊友朋裘
褐不自蔽藿食空營營四顧裁沴餘但聞號苦聲日負
道德懿敢懷軒冕榮節食慎所欲聊以厚我生

高步覽九州誰獨無與親同室不相喻矧彼途路人誘
誣更驅迫巧詐日眩真共美為善樂莫知與善鄰未足
保厥躬已謂貽子孫一言易為義一恩易為仁世無魯
東叟何以慰心神

哀飈驚野草日夜委鮮腴嗟哉白楊樹高高凌玄虛朝
遊車馬中夕息思故廬塵襟難為潔野性非京都貧賤
不自保焉能戀簪裾賴有死與生可齊賢與愚

去婦詞

并序

江東有一士子留都下三年適娶一貴人女為妻久乃
知其已有妻子矣一夕逃去因託去婦為之詩非徒欲
傳其事抑以示風戒云爾

輕合鮮義終苟容希禮遇遠結萬里昏多為才名誤始

與君結好不知君有婦有女嫁他人俱懷託遲莫青青
墻下草生死墻下路娟娟道傍華零落無處所女子失
其身何以保貞素既乖百年意百年誰能度對鏡空悲
惜中心良難訴浮萍難為託一木無兩附棄舊屬新歡
新歡漸成故寧當中路析莫被他人去寧老阿母傍不
受他人妬騰身出房闥兩絕無復顧所願嫁他人甘心
西山樹

四友詩 并序

四友者廣信王庭鈺良仲李商弼良佐武昌盧廷鸞子儀同里熊坦從正也李亡已七年餘亦亡二三年余索居京師每夕夢寐與四友相接傷其皆賢而無壽又與予篤好廼作四友詩一以志余哀一以槩見其平生云李得年二十二盧二十九熊三十四王四十有九

王兄負奇偉十四已應門倉卒遘閔凶盜賊蔽丘原衰經從伯父慷慨安其人豪橫劇狼虎瞋目莫敢干降心相欵密共稱孺子賢時應州縣役調笑官長尊酬接雖

靡監講習日多聞激烈忠憤際委曲禮法間時平俗益

康放志農圃言

有集曰
圖課

浮湖感龍變

當汎彭蠡見龍見
遂肆意墨龍悟解

絕陟嶽思鳶騫古笛振哀鉄清琴繁素絃每傷古人逝

迸淚尊酒前與我初識面已誓為弟昆誰謂天不仁中

路遂離分寥寥昂山阿黝黝硯井泉賓客一以散託夢

與招魂

嘉木不叢生猶為造化欺繁霜凋其葉震風蕩其枝利
蟲齧其根飢禽啄其皮豈無雨露滋不得干雲霓李氏

年弱冠博通三氏詞援毫捷飛電吐氣裂豹螭信如海上潮直若琴上絲朗如九秋月溫比三春暉志在躋聖賢寧復顧所私一悟生滅理天地忽若遺

君卒時一日晨興有數道

人叩門謁求作白蓮庵記君援筆而就大為得意有頃忽奄然坐逝父母聞而趨哭之迎謂父母曰某兄弟幸多死生命也勿以為憂既瞑一道人撫其背曰檀越檀越生好處生好處復瞪目視道人厲聲曰佛法本無生滅卒癸卯二月也葬時衆輿出城初不能勝忽輕如羽顏回蚤聞道短折非所悲

茫茫後死者中夜獨漣漣

武昌故舊中盧生亦奇傑雄才傲當世高誼凌白日貧

賤有相知富貴莫能折冠蓋如雲霧而獨與余密大德
七年夏予有長沙役臨河與予分攬袂久嗚咽知心託
生死誰能此離別千里竟相從風波復炎熱青天入杯
酒歌嘯中夜激便欲乘滄溟超遙送華髮行行亦云至
終當與君析捨棹即長途惆悵如永訣謂余平生懷時
俗莫能達學不追古人終不願有室還聞起分教小邑
傍蕭瑟始為賢者哀那知遽淪沒樊山罷歡譙赤壁空
流月佇立想音形音形一何闊

親友日凋謝況我情所鍾熊子三十餘亦在九原中高
才祇促齡積善適為凶天道不可依人命如飛蓬夢寐
常相見炯若生相從亦知心不異矧復里閭同始君掾
韶學我心實忡忡歸來已三年微疾竟永終薄祿不救
饑一官非高崇獨令君子亡碧血冷秋風鄰曲思愛絕
山川談笑空名家失金匱檣櫓入公宮誰復繼粹溫徒
用相舂容千秋瓘山路繚繞劒池東

賦雙陸

三五對參差高呼得采時猶疑雙出早每恨獨歸遲散
地偏難入全功或誤奇極知妨日力聊足審安危

泊安慶時再北遊

夜泊淮西郡寒生客子衣酒家臨岸閑野燒映江飛雲
盡月初出潮平風漸微前年城下路此際正南歸

漁父

夫前撒網如飛輪婦後搖橈青衣裙全家託命烟波裏
扁舟為屋鷗為鄰生男已解安貧賤生女已得供炊爨

天生罔畧作田園不教衣食看人面男大還娶敝家女
女大還作敝家婦朝朝骨肉在眼前年年生計大江邊
更願官中減征賦有錢沽酒供醉眠雖無餘羨無不足
何用世上千鍾祿

高郵城

高郵城城何長城上種麥城下種桑昔日鉄不如今為
耕種塲但願千萬年盡四海外為封疆桑陰陰麥茫茫
終古不用城與隍

濟州初度

辭家計日逢初度
遲日暄風在帝京
曉起慈親望天北
北行初泊濟州城

楊柳青謠

楊柳青青河水黃
河流兩岸葦籬長
河東女嫁河西郎
河西燒燭河東光
日日相迎葦檐下
朝朝相送葦籬傍
河邊病叟長回首
送兒北去還南走
昨日臨清賣葦回
今日販魚桃花口
連年水旱更無蚕
丁力夫徭百不堪

惟有河邊守墳墓數株高樹曉相參

雜詩四首寄彭通復

日月麗中天列宿爛昭昭河漢高且深烏鵲以為橋寒
霜昨夜降時菊委嘉苗地勢西北雄終歲皆風飈玄工
宰萬物時至有榮消常恐光景馳不得與逍遙

區區九州內橫從數千里誰設山與河愚者分表裏京
師天下本萬國赴如水珠犀從南來狗馬由西止浩浩
荆吳船日夜行不已生材無定所一物孰非己皇天仁

且廣君道亦如此我思古唐虞當日誰共理

巢由伏箕潁園綺居商顏洗耳甘自潔茹芝竟不還三
傑足為理五臣安可攀高尚誠所貴孔轍奚獨環吾聞
有隱淪多在衡霍間飯牛腹長饑百結淒以寒懷寶羞
自獻邈然老空山

脉脉我所思彭氏躡躡遐蹤婉婉若處子未曾出房櫳相
望四千里踰年闕相從五月君寄書九月達京中我書
欲報君書到歲已窮豈不懷繾綣無由覲君容參差天

際雲縹緲乘朔風羽翼不吾施翩彼南飛鴻君有高世
行我無適時功天命人得違出處諒非同

栢堂詩

并序

栢堂為劉母熊夫人作也夫人有淑德年二十五而寡
守志不嫁有子曰觀又賢作堂以奉其母請名于太史
氏謂之栢堂而作是頌

鬱彼北堂言樹其栢其栢寢寢維木之特栢之始生于
彼高陵雨露其凝金石其貞栢之既成鳳臆鸞膺言樹

斯庭霜雪是憑雪霜浩浩其栢矯矯有美君子而弗偕
老其葉纍纍其節桓桓其居安安永世式觀我堂既構
我栢既茂天錫眉壽保艾爾後

文安集卷一

欽定四庫全書薈要卷一萬六千三百九十三

集部

文安集卷二

元 揭傒斯 撰

詩

獻張平章

天歷肇玄朔坤輿集皇靈汴蔡既榛夷南海淪炎精圖
書入天府將帥功業成寶玉被親懿茅土列公卿庶類
奮休祥羣賢基太平明公紹鴻烈文采敵華聲出入三

十年惕然心靡寧論兵體安危攬轡思澄清矧宅股肱
地夙夜在王庭名高德益難位隆責匪輕聖心試弘裕
臣節美戰兢唐虞登夔臯堯舜猶日升周召竭師保成
康措王刑昌明願同濟援筆播芳馨

題祝道士龍虎山光天觀圖

聞說先天觀重重絕壁環鳥啼青澗裏花落白雲間樵
子能長嘯居人識大還洞門無處認唯有水潺湲

二貞詩

并序

關右有姬氏父子皆蚤世姑趙婦張皆以年二十五而寡守節不嫁作二貞詩

關右有姬氏父子皆棄捐孀婦奉寡姑誓死各芳年膏沐誰復理羅襦委篋間辛苦事蚕繅祭祀亦靡愆父母既莫奪媒妁徒空言鳬鴈安所施幣玉視如烟寧與枯悴沒不為歡樂存婉婉桃李花春鳥何翩翩萬物各知時姑婦獨纒然

史館獨坐

地負天逾近風高午尚寒
虛庭松子落歌檻菊花乾
撫卷俱千古憂時有萬端
寂寥麟父筆才薄欲辭官

周待制致樂堂詩

有堂渠渠在番之區維周壽母式燕以娛
渠渠有堂在番之陽維周壽母式燕以康
斯堂何有有蘭有芷垂佩
榮榮維周之子斯堂何有有蘭有祿垂佩
申申維周之孫曰烝曰嘗
孔時且具維甘維旨承于壽母母曰寧
只福祿凝只升斯堂只我心平只母曰嘉
只福祿遐只升

斯堂只我心和只

馬氏巖溪圖

何處幽巖下復有清溪瀉霧氣散長林湍聲落平野石
宜白鳥憩樹想玄猿把誰獨此安居居人云姓馬

山水圖

幽人無世事高卧謝浮名山崦晴時出溪流盡處行還
聞有漁釣相問扣柴荆不埽門前路莓苔滿地生

送道士薛玄卿歸江東

知君此日漸難招只在人間已廓寥市上有時逢賣藥
山頭何處覓吹簫仙巖華落溪流滿鬼谷雲開樹影遙
未必故山安隱逸海天涼月夜蕭蕭

大明殿退朝和周待制

巍巍道德拱義皇濟濟威儀陋漢光日射龍文宮女扇
風傳鷄舌侍臣香中霄景氣浮雙闕下界歡謠動八荒
詞館小臣何以報皇圖聖壽與天長

祖生詩

浦城孝子身姓祖自憐性命如糞土生纔五歲遭亂離
有母更被官軍虜零丁二十八春秋母縱得生何處求
天地茫茫明月恨江山漠漠白雲愁忽得母書驚母在
看書未盡淚先流書云流落河南縣河南踴遍無由見
唐州境上忽相逢白髮蕭蕭霜滿面誰知喜極情轉悲
旁人更問初別時千生萬死到今日始為母子東南歸
東南迢遞閩山路入門猶記階前樹居人傳說盡相看
鷄黍提攜竟朝暮祖生母子真可憐少壯離別老大還

同時鄉井被兵者幾人骨肉能生全願生母子長壽考
四海升平永相保

孤雌行為郾城節婦作

有鳥有鳥雌雄相追哺雛未飽鳴且飛雛未長雄乃死
子亦隨朝朝暮暮唯孤雌長林廣野風日美步步不敢
離故棲燕雀颺颺差復池迴身側腦遞相欺誰憐孤雌
心到死終不移更有許州郾城徐氏母一生抱恨守空
閨

燕氏救兄詩

千金之子不死市楚人竟殺陶朱子生者可殺死可生
千金為重骨肉輕誰謂平陽有燕氏傾家乃出而兄死
弟再有兄兄見弟里閭驚嗟官吏喜嗚呼安得天下之
吏廉且循庶政如水無冤民

送華尊師以天壽節奉詔祀武當

靈時巖漢祠神峰標楚甸羽人丹丘伯承詔馳嘉薦華
渚曜玉虹條風舞玄燕長淮南中瀉喬嶽雲間獻涉旬

歷峻趾梯空答弘願授簡香始升揭虔帝如春天清翼
軫動地肅玄武見飛響迥更聞奇祥靜逾絢是中有真
侶蚤接諸方援胼胝負畚鍤鑿翠蓄雷電金芝產齋房
喬雲冠巖殿祈禱無歲年會節方紛行既協時君降又
樂明祀徧聖歷齊堪輿豐澤周寓縣還歸報天子獨往
奚所羨

真侶謂張真人有道行

送馬雍古御史撫喻河西

我皇屬憂顧君子得安居孟春風且寒遺子以脩途四

壯何翩翩迴首睇神都我懷正紆鬱歎函忽已踰積雪
被長巒萎者何時蘇歸彼蓮花峰上出浮雲衢白日皦
以縣下視若玄墟煙塵起西北原野無定株行者中顧
懷居者念其廬黃河洶東流乃自崑崙渠四海豈不曠
切若肌與膚親賢遠讒人古以致康娛君子誠多材乃
用在馳驅秦隴阻關塞歲月浩已徂鞠躬盡明義足為
世所模

送周山人之遼東

物變風已暄庭虛雪猶在每與君子違偏驚歲年改名
山先夢到靈藥隨方采明日望行人雲槎隔遼海

李宮人琵琶引

并序

鄆縣亢主簿言有李宮人者善琵琶至元十九年以良
家子入宮得幸上比之昭君至大中入事興聖宮比以
足疾乃得賜歸侍母給內俸如故因亢且乞詩於余遂
作李宮人琵琶引其辭曰

茫茫青塚春風裏歲歲春風吹不起傳得琵琶馬上聲

古今只有王與李李氏昔在至元中少小辭家來入宮
一見世皇稱藝絕珠歌翠舞忽如空君王豈為紅顏惜
自是衆人彈不得玉觴未舉樂未停一曲便覺千金值
廣寒殿裏月流輝太液池頭花發時舊曲半存猶解譜
新聲萬變總相宜三十六年如一日長得君王賜顏色
形容漸改病相尋獨抱琵琶空歎息興聖宮中愛更深
承恩始得遂歸心時時尚被宮中召強理琵琶絃上音
琵琶轉調聲轉溢堂上慈親還佇立回看舊賜滿床頭

落花飛絮春風急

題上都崇真宮陳真人屋壁李學士所畫墨竹走
筆作

玉京灤水上仙館白雲鄉虛壁數竿竹清風生滿堂微
吟弄寒影靜坐佇幽香有客仍無事淡然方兩忘

集賢大學士趙國公王開府慶八十應制

昭代雍熙日詞林賦頌時紫宸丹詔出甲第五雲垂裕
廟青宮裏王公玉樹枝朝趨陪綺角夕侍接龍夔際會

真難及飛騰已在茲
暴公初繡斧方叔更藩維
霜簡驚風采天官肅羽儀
還迎代邸入竟被漢文知
位望躋三少權衡俯百司
每蒙天黼黻直許國著龜
鳳歛廣寒殿龍舟太液池
羽觴春侍宴玉座夜觀基
德業前賢繼辭華後進推
高情晞廣受餘事擬徵珪
全趙山河富瀛洲日月遲
九卿看綵服八表表龐眉
皇覽逢初度殊恩介壽祺
黃封中使出玉食尚饗移
國老陳嘉慶

李韓公作序

羣

公播盛辭禮非前代有施及老臣宜福祿何人並忠貞

百歲期聖心誠念舊政用作臣規

陵陽牟景陽以名祖父之子孫負奇材勁氣而與
世抹掇自台州教授入掾翰林一語不合竟棄
去不顧以詩為別

奇璞刖之媒蛾眉妬之具悄悄君子心皇皇百王度高
風集大木日夜如吼怒不畏枝葉殘但恐本根蠹曉登
榮臺上天地一何巨白日光未吐羣星爛無數仙人五
雲車縹緲玉清路區區陰陽中可望那可遇忽聞金鑾

客歲暮仍南去不得與之同頓足毛髮豎

結羊腸詞

正月十六好風光京師女兒結羊腸焚香再拜禮神畢
剪紙九道尺許長撚成對綰雙雙結心有所祈口難說
為輪為鐙恒苦多忽作羊腸心自別鄰家女兒聞總至
未辨吉凶憂且畏須臾結罷起送神滿座懽忻雜顚顚
但願年年逢此日兒結羊腸神降吉

劉承旨父大司徒邢國公慶九十應制

聖主尊賢遂及親邢公盛事更無倫身躋九袞瞳方碧
兒過耆年鬢未銀鳩杖乍頒寧畏噎龍章游拜欲忘身
上公建土山河富光祿分壺雨露頻析木天清雲五色
梁園花發月重輪

錫宴梁氏國

三宮寵錫驚殊數四座稱觴

半老臣瑞錦欄編迎化日兼金條脫照芳春素烟冉冉
晴熏上白雪泠泠豔曲新先世勲庸歸琬琰名家父子
映冠紳三槐已驗移居日五柳翻如寄傲人澗底桃花
曾閱世枕中鴻寶自顧神詞臣欲繼莊生作才薄何堪

論大椿

小孤山次韻

小孤山前一迴盼，蒼然始識孤山面。
隔江疊嶂開翠屏，絕壁浮雲飄素練。
憶昔初蒙翰林聘，艤棹探奇不知倦。
捫蘿涉級至絕頂，目極神開氣為變。
大江東匯彭蠡來，晝夜崩騰奔海甸。
笳鼓遙聞日月動，帆檣忽度乾坤轉。
舟人不識造物奇，但趣急趨南風便。
蚤悟微官七載縛，底用區區厭貧賤。
深窻冷壁守編摩，何異揚雄困雕篆。

重來勝地歲云暮短景催人疾於箭天昏一火明山半
石底猶疑有雷電彭郎磯下寒浪湧坐客正說龍君傳
人生可喜還可憐世事堪違不堪戀明朝匡廬復入眼
雖有此境何由羨武城先生獨好事名山每恨遊難徧
豐城客子無一錢但當作詩乞如願

贈別曾編修歸廬陵蔡學士兄

孟冬涼風厲謁告歸廬陵阿兄在九原歲暮豈遑寧兄
昔事武皇海內希英聲意氣動人主文采何從橫時事

一朝異長揖去躬耕令弟紹芳猷策足在承明如何奄
忽間南北隔死生方舟發京國日落烟霧青萬感緣中
來惕焉如有懲羈臣戀魏闕一夕魂九升君子恩義重
況此骨肉情情深不可忘悠悠道路長山川日夕改我
行殊未央稍出燕冀都已涉齊魯疆高天圍四野悵望
但茫茫道傍多古墳塋域遞相當荒草吹北風日夕下
牛羊不知何代人於此閱興亡自古既有死誰獨免摧
傷死者雖所同私懷詎能已塗路猶感傷況我兄與弟

世俗日衰謝常懼莫能起生者忽若遺誰復哀其死念
昔賢哲人一一去為鬼詩書捐篋笥采采當路子挾藻
厠明庭幸與君子同矧在弱冠年已獲承其風家本聖
門後孝友世所隆何意手足親一別曠音容及我南歸
日舟楫復相從皦皦寒日高冥冥厲征鴻落帆滄江際
渺然忽西東努力慎所托無為謾勞躬

寄題臨川西澗范氏寓居

蟾塘塘更西幽澗總堪題流水花間住孤禽竹裏啼石

稜苔自合山徑樹相齊久客成真隱故園應已迷

尋舍弟將至東牢宿野店

歲暮尋吾弟山行兩舍餘入雲攀磴道落日及村墟茅
店溪邊冷松林石上疎如逢武陵客風景未應殊

贈王郎

王郎楚狂士意氣飛秋霜讀書一萬卷下筆數千行富
貴視浮雲况肯矜文章十五恥閭里掉臂辭故鄉夜宿
東海月朝買西州航瞋目王公前結客少年場一飲或

一石一醉或一觴寧揖屠狗人不與俗士當千金不易
笑歲暮單衣裳阮籍在窮途英聲連四方鸞翮有時鍛
反愧燕雀翔世無劇孟交不及青樓倡燕趙如花人翠
袂黃金璫不識豪俊士空媚癡與狂王郎遠過我坐我
枯藜床終夕無酒飲撫髀歌慨慷平明別我去極目空
茫茫

沈逸人東觀招飲山館

野館青山下晴軒積雨餘招尋蒙遠客寂寞愧閒居空

翠沾盃冷殘雲度谷虛從茲結朋好隨處問何如

畫鴨

春草細還生春雛養漸成茸茸毛色起應解自呼名

題聶氏陶軒

開軒南山下日對南山雲青松俯前楹秋菊被中園翳
翳脩竹林清泉出其間歲晏農務息銜盃樂餘閒時從
隣曲游共稱稼穡難達人貴知己俗士多所牽以茲謝
簪紱委心此南軒列植既敷榮佳興日以繁讀書教兒

子餘事焉足言

送涂雲章訪舊武昌卻入京師

垂雲厲驚風萬里摩高圓蟠泥鼓巨浪宜願九重淵毛
生入楚庭穎脫俄頃間粲粲徐公子長嘯起丘樊朝辭
豫章臺暮宿匡廬山大帆割鸚鵡極目空波瀾黃鵠錦
袍仙吹笙紫霞端相顧一笑粲青春滿南天黃金築高
臺更覺郭隗賢聯翩樂劇輩相逐入幽燕平旦九門開
劍佩踰五千豈無一字薦傾倒平生言東風杏花開待

我薊門前

歸舟

汀洲春草徧風雨獨歸時
大舸中流下青山兩岸移
鴉啼木郎廟人祭水神祠
波浪爭掀舞艱難久自知

小孤山曉發和蔡思敬韻

日落霞明錦浪翻
屋傾石峭白雲間
乾坤上下雄孤柱
吳蜀東南壯此關
神物夜移風動地
仙舟曉渡月漫山
回瞻絕頂登臨處
空翠冥濛杳靄間

大信晚泊呈舟中諸公

千家楊柳江當門東梁西梁兩岸蹲連檣大艦集日昏
撻金伐鼓海上聞小江更出采石後前人立功後人守
大信花采石酒陌上相逢莫回首

白楊河看月

白楊河上看明月昔人曾見今人別茅屋數家河上村
化作三山白銀闕波平風靜棹歌來萬頃沖融鏡面開
今夜江南憶游子空瞻雲漢上昭回茫茫萬里燕齊路

北斗從橫泰階曙黃河東逝月西流明日南風過洪去
歌風臺和李提舉韻

萬里東歸火德開漢王曾此宴高臺沛中父老謳歌入
海內英雄倒載回湯沐空餘清泗在風雲猶似翠華來
穹碑立斷蒼烟上靜閱人間幾劫灰

題嚴陵獨釣圖

何事玄纁入里閭羊裘暫脫就安車空令太史驚同寢
猶把狂奴視報書一出聊為天子重諸公莫道故人疎

朝廷自足中興士且放桐江著老巖

題鼯鼠食衣圖

種衣中國予亦勤止衣長而實汝則殘止雖則殘止予
敢汝仇天實汝生予將何仇汝食之甘既肆既閑實之
食矣無傷予根根存而微惟予之窮根盛而實惟乃之
功

哭信州僊源觀徐尊師乃玄教大宗師張開府之
弟子也

玄霜搗罷世都遺，葛屨蕉衫太古姿。
天上真人開府日，山中仙子閉門時。
空林雨過金芝老，深谷雲寒白鶴饑。
萬里馳書為永別，盧敖何處定相期。

送蔡思敬還豫章有懷遼陽李提舉

來日能同去，不同獨攜別。恨向秋風眼，看亂葉渾無定。
心與浮雲併一空，黃獨山中歸自斲。玉梅溪上夢先通，
莫啖留滯京華者。更有遼陽送斷鴻。

孔林圖詩

有序

集賢待制周侯能修禮于孔林侍讀學士商公圖之史
官揭傒斯詩之

峩峩尼山蔽于魯邦篤生聖人維民之綱尼山之下有
洙有泗有蔚孔林在泗之溪維彼聖人教之誘之凡厥
有民則而倣之維彼聖人覆之載之凡厥有民敬而愛
之既誦其言亦被其服孰秣其馬于林之側既誦其言
亦履其武孰秣其馬于林之下六轡既同周侯之東薦
之侑之聖人之宮其音洋洋其趨蹌蹌其臨皇皇聖人

允臧商氏圖之式昭其敬載瞻載思罔不由聖

壽櫟山詩一首為吳真人生朝作壽櫟山其里山名

峨峨壽櫟山湏洞雲錦溪百里空翠合諸峰南斗齊卧
斲月窟桂坐聽搏桑鷄臨深測地軸升高徑天倪陰厓
覆瓊藥陽岡敷紫萸縣泉聒空響飛樹凌風嘶側畏猿
鳥墮幽恐漁人迷茲山不自高與人作丹梯赤松棲其
東王喬總其西浮丘前捧擁安期後提攜神君領天官

出入黃金閨梅花照羽袂天書函紫泥歸期指松櫟千
歲猶未稽飡和養靈源伏智埽荒蹊木公與金母大笑
彭鏗低

壽王副樞

七袞懸車兩府稀五朝遺老百僚師寒梅看足行吟處
舊史評來坐嘆時身退已將心共遠名高轉覺世堪遺
且陪嘉客霑春酒政待武公歌抑詩

李將軍歌一首送李天民赴邵武軍口巡檢

李將軍材且武儒冠換得兜鍪去身疑南極老人星氣
食陰山雪毛虎雕弧白馬金僕姑天地昂昂此丈夫五
十方為求盜使人生何用苦詩書寄言邵武諸官長不
是尋常一腐儒

時中書以吏部儒選員多有十年不得
調者奏以為閑廣諸道巡檢然多非其

人而天氏武稱是選
老人呈其常自俞

題桃源圖

并序

江左龍虎山南十里有桃源者劉王二尊師所辟也臨
江范亨父為之記余為賦五言詩十七韻

桃源非一處龍虎畫難同內外關踰鐵高低石作鼓黃
旂青劍北紫蓋白雲東蟾影當霄迥蛾眉抱月弓

六峯名

千重藏曲折四面削虛空地戶吟風黑天池浴日紅雪
霜翻濺瀑雷雨瀉崩洪暗藏猿啼遠晴聞鳥語工危龕
三井秘絕澗九橋通江合仙巖怒山連鬼谷雄劉王開
闢後秦晉有無中時見看桃侶頻逢採藥翁丹臺寒漠
漠琳宇氣熊熊濟勝非無具緣源恐莫窮烟霞俄變滅
草樹杳龍蔥四序何勞誌羣愚倘擊蒙誰言武陵近十

里上清宮

送人歸豫章

積雨霽徂夏故人今日歸
手持毛生檄身著萊公衣
玉樹挂秋月丹萸揚曉暉
東湖徐孺子應怪久相違

送王留守宣慰荊湖

舟楫連檣出薊丘
弓刀千騎入荊州
歌翻郢雪寒暄變
恩逐岷波日夜流
雲雨暝連神女宅
山川晴繞仲宣樓
豈無賢士堪招隱
應向鹿門深處求

題張尊師畫

晨登翠微天氣穆清白雲覆谷飛露垂纓孤猿遠響衆
鳥嚶鳴牽蘿涉澗穿石度陁半巖華氣萬壑松聲神宮
漠漠靈戶熒熒投陰迹影叩寂求應素髮老人笑而相
迎弗問弗承悟彼長生玄玉流液瑤草結英浩浩犇泉
出與川平宛彼下人望我品局

送播州楊宣慰歸藩

祇奉綸言出夜郎恭陳壤奠入明光嘉名宣賜黃麾外

大宴恩陪玉座傍天仗影移低日月宮懸聲動下鸞皇
三呼拜舞君王德永共藩臣守四方

雙旌遙指洞庭西十乘聯翩度五溪龍虎親軍兼使節
犬狼諸獠入封提光昭廟祐恩波遠風動藩維禮秩躋
北望五雲高魏闕亦知憂顧在黔黎

寄題括蒼王氏東野二亭

畊雨

時雨布嘉澤羣物盡欣豫晨興集童僕東野從所務鵠

鵝應候鳴黃鸝翔高樹衆草萋以出流潦被行路黽勉
勤微躬寧復當世慮義農不我待沮溺諧所慕食力隨
齊民常恐負空素眷言徇茲道卒此年歲莫

心遠

窮居豈余志無營得長閒翳翳三畝宅顧樂彼南山灌
木何蒼蒼雲鳥相往還已絕嬰世念况接仁里歡但願
黍稷登春酒恒慰顏羲和緩其轡萬物悠然安

寒夜作

疎星凍霜空流月濕林薄虛館人不眠時聞一葉落

送唐尊師祠武當

龍袞分香下絳霄羽衣承詔出清朝星臨翼軫南垂閣
神降虛危北極遙金殿壓雲開紫氣玉臺和月合笙簫
蕃釐更為吾皇祝下國時豐雨露饒

送詹尊師歸廬山

香爐峰色紫生烟一入京華路杳然雲碓秋閒春藥水
雨犁春卧種芝田書憑海鶴來時寄劍自潭蛟去後懸

忽報歸期驚倦客獨淹微祿負中年

贈淳貞子

蕩蕩白玉京超超淳貞子十一求神仙服事丘與李嵩
洛三十載結茅白雲裏食是暘谷霞飲是玉池水鬼神
莫能識百念吹不起一朝忽騰化徑去不可遮飛駟服
五龍角巾搖三花朝發扶桑國暮宿河漢槎朝食千歲
桃暮食五色衣長揖青牛君高歌渡流沙還憩金陵邸
調笑許史家日食五侯鯖安得厭胡麻春風長安陌落

日邯鄲道迎人上青天送人入秋草竦身八極外天地
忽亦老寄謝區中人全真以為寶

孤松篇壽王大學士

大地凍欲裂孤松高穆清橫睨泰華嵩俯察蓬瀛瀛天
風四浩蕩身與元氣并根深本自固霜雪空崢嶸白晝
甘露降半夜朝陽升飛枝蔭扶桑勁氣摩攬搶羣鳳所
託命百鳥徒嘲鳴冥冥廣寒宮丹桂亦虛生八萬四千
人何時月常盈維此天一柱千歲所養成自非堯舜君

工垂焉敢徵漢武作建章千門照西京掄材當此時餘
柯了棟楹天地既有此未必終無情蒼蒼歲寒心永世
仰堅貞

過何得之先生故居五首

可憐古井門外依舊鍾樓屋西何處高吟痛飲黃花翠

竹都迷

先生有詩云一井當門凍寒光照
四鄰又我住東街北鍾樓在屋西

心事巢由以上文章陶阮之間千古高墳保下白雲明

月青山

軋軋機聲日暮依依揚柳春柔邨下中郎小女曾聽唱

我高郵

先生嘗喜余高郵城詩相見即呼高郵城來每相對酒酣則朗誦數遍

頭上烏紗分贈篋中縞楮相酬不道別時常別誰知愁

是真愁

延祐五年冬十月余南歸以巾材一段見贈予以白楮被報之別時殊黯然也且手書其三代

名字授子若有所屬然也

屋上青天未老門前白日常新他日臯夔稷卨安知不是斯人

題吳越王答周克儉謝賜物及陳事宜狀手帖

吳越山川畫不如古今人物半能書
從容霸國君臣禮
猶見錢王翰墨餘

送譚仲章歸長沙

君家雲陽下忽向雲陽歸
行路有南北看山無是非
三湘迴鴈盡孤劍白虹飛
亦欲投簪去從君采薜薇

我我亭詩

有序

殷仲堪荅桓溫曰我與我周旋久寧作我宜春
黃元瑜取以名其亭曰我我為賦詩一首

我游于袁于龍之干有闢閑閑有環言言有構桓桓維
集之安我居我處我笑我語有翼其所而敢予侮我植
孔嘉我構孔華曾莫之迎而莫我多彼馳者子亦孔勞
矣既我覲矣亦莫我逮矣嗟殷氏之老猶弗桓是友我
不我友將誰歸咎溫溫其飭瀏瀏其清藹藹其芳煥煥
其明維古之人尚或予聽

送鄭司獄歸衢州却赴調京師

壯年執戟事明君一日上書天下聞不恨棲遲百僚底

猶堪激烈萬人羣
爛柯山遠迴孤棹
析木天清望五雲
盡說于公有陰德
掉頭相別大江濱

題山水

野艇來無數
山橋渡有三
寒雲依古寺
落木帶羸驂
迴首重重變
幽尋處處堪
平生雙眼力
江北復江南

題御馬圖

朱纓金絡轡
黃帕錦鞍韉
神閑意更逸
初下赤墀前

題山暉圖為劉尊師作

陵岑毓神秀草木咸光晶每覽靈景異變態如有情閃
掩乍如羃飄浮忽相縈熊熊轉空曲奕奕連增成中有
幽人居燕坐朝玉京窮陰亦朝徹無月恒夜明碧桃千
歲花金芝四時榮猶疑地愛寶隨物弄華英

題臨江同知問流民事蹟

江北流民七十口三十餘年在江表朋凶結惡四百餘
白刃差差歷村保崩騰所向如投空白晝攫金都市中
頃由南昌入豐邑反賂守者為先容長官坐堂寇入室

妻子莫逃况金帛豈無鄉民敢相敵長官一揮翻辟易
臨江貳守廉且武手縛其渠散其伍豈惟鄉民得安堵
鄰境聞之皆鼓舞其渠在獄伍四歸大府上功民俗熙
乃知一念敬厥職萬事至難皆可為人民社稷我所有
安得坐視如鷄狗人在鷄狗猶愛之民社豈在鷄狗後
請君看取臨江守

寄題朱氏真村堂

深居魏亭北悃悞自無華風俗似太古生涯如小家飲

醇猶恐過衣帛尚疑奢相與鄰人異詩書有五車

送人從軍

妙年好文仍好武一旦從軍氣如虎彎弓已作滿月圓
拔劍更逐迴風舞悲笳四起旌旆愁蒼山偃蹇黃雲浮
陣前手繫降王頸馬上仍懸猛將頭復讐義大身命小
順天將軍古來少一戰功成六合清不用黃金印如斗

題淵明歸去來圖

并序

清江皮使君治南恩有惠政一日自免去而歸老馬廬


陵王實初賞其高節以淵明歸去來圖求中朝學士大
夫賦詩還以為壽僕用其意賦五言一首

吏事久見牽山澤曠遊盤茲辰理還策乃得從所歡悠
悠川塗迥忽已造郊園風景一不異鄰曲皆奮觀童稚
識人情犇走向我前荒草雖誕漫松菊了不干睠焉循
初服常恐負昔言入室多美酒步庭嘉樹繁曠然心神
舒誰謂世路艱出處各有道既倦當知還方春農事興
念之每忘餐貴賤豈不殊樂此農圃安堯舜垂衣裳巢

許箕穎間漢祖除暴秦黃綺在商顏嗟彼賢達士今古
胡不然永與簪組辭婆娑養餘年昔聞陶彭澤今見皮
南恩千歲仰高軌茲圖良足歎



文安集卷二



總校官庶吉士臣侍朝

校對官檢討臣蕭九成

謄錄舉人臣李駟